

# **Kayëte mba Pol nte kerëhnëka Tit Wade yehëhna hnë inji kayëte**

Tit, ale wok gena sëwif, arëfëlënta Afayik Pol hnë ðoku hna yeho. Pol kerëk inji kayëte ndampo fo gë kayëte ndënkwëryënkw mba Timote ña, mpëd hnë bëhn wafëhw imbëd g'iryaw g'imbëd (65) hna ga ndëcëk hnagi Yesu ÿa. Mpëd Masedëwan hna nkeho do Tit hnë tinti mbë wov le ÿak naÿëk do wacik Këret vë Gëres hna, nkeho. Pol hnam tavëkawo soñe tëhnahni vëvë haryënkw fagant vële hwëtahnëk. Had kayëte ndënkwëryënkw mba Timote hna, Pol ankeya nte rëfëka soñe ayehahn avë haryënkw nësëd. Ankaband gante tëfëka ntiyini vëharan wamër va. Do nësëd hak tëfëka karanjini anech-wo-nceh hnë cery sali hna.

Wëlin wanës wakwëhn nafa hn' inji kayëte: toña, tëfëka, ikaran, wanës, ikwëtahn, nkeya, satah, Afehët, ipërëna.

Wëlin gante nke kayëte ka:

Pol Tit kerëhnëd (1.1-4)

Ðoku Tit hnë Tinti Këret hna (1.5-9)

Vëharan vëwër va (1.10-16)

Ikaran anech-wo-nceh hnë cery sali (2.1-16)

Ankeya vële hwëtahnëk (3.1-15)

*Pol Tit kerëhnëd*

<sup>1</sup> Ami Pol, ayohal Wën do afayik Yesu Këris herëd anj kayëte. Wënu ña hwëtehna hna vële tëhna va do yëtëdanëwëhni toña le rëfëlëk gë ankeña nte nëjëdëha.

<sup>2</sup> Toña rac njëtëdanëdëhëhni nuñani uwám usër. Wënu ña, ale wok mërëdina, ntehnëk njëdadëhëfu uwi wám usër kobëri wapëgwa hna.

<sup>3</sup> Wën Afëhët alëw fu gë wanës wadëwu ña njëtëdanëk, hnë wati le tëfëkawo hna, hnë wafay wale hwëtehna hna buho wã pëyahnebuho gante ntehnëkowo ka.

<sup>4</sup> Tit, wëjë herëhnëryidëfu, ajë mën paryi hnë ikwëta hna nte varëlehnëkëfu hna: Arabi Wënu ña Rëm ya gë Yesu Këris Afëhët fu ya ndëwanihi do njëdënihi yam ya.

### *Doku Tit Tinti Këret hna*

<sup>5</sup> Tavëmi Këret hna soñe afadën doku le wojëk ya. Hnë cery sali-wo, kwëtëryihni vicër had gante ntehnëmino ka.

<sup>6</sup> Avë haryënkwa a tëfëka cat do ñëla asëval aryampo fo, vutahu va tëfëkëhni nkeni vële hwëta hna, do tëfëlahna njëta hni had vële hwëhna nkeya meh, ma ñwëyëhne dëni hëhni vële hnagëkëhni va.

<sup>7</sup> Kabi ale ye ankaf hnë cery sali hna, umë hwëtehna hni viyë Wën va, tëfëlahna kwëhna ile nira dë, tëfëlahna njafëhni vëyëntaw va, antë njanca ntavah, antë nke aryëw, antë njap, antë njëkëlehnëd hnapul gë rumpak.

<sup>8</sup> Tëfëka kol kaca vëhneh ña do ñand ile yivëk ÿa, kwëhna hakili, cat, do pac, njët nkaf ntëwu ña.

<sup>9</sup> Tëfëka njawën dus wanës wacatah ikwëtahn ña, wante rëfëlëk gë wante karanjëdeni vahnë ña. Koyëna kod kamënaÿehnëndëhni vëÿëntaŵ va gë ikarañ pacah nte karanjëdëhëhni ña do tufëhni vële wajëdëha va idënt dëw hni ña.

### *Vëharan vëwër*

<sup>10</sup> Ha, vahnë vëyabah vëlënënedina, do dënk hnë wasëwif vëryaŵ vële hwëtahnëka Këris va. Tokadënihëhni vahnë va gë wanës wadëw hni wawkëhn nafa këm ña.

<sup>11</sup> Afo aryemëhnayehnehni, kabi fop cëvëd ikwëtahn dëw hni hnë watere wadaŵ. Ile wok cañëna ÿa karanjëdënihëhni soñe nuÿahnëni hnapul le wok pacëna.

<sup>12</sup> Aryampo hnë vëhni, kila lëw hni, lehnëk: «Vëvë Këret va vëwër kwëlëkwël ye, wulaŵ wuyapah, vëhëmak vële hnahad roka fo ye.»

<sup>13</sup> Do fop ile nësëd ÿa toña ye. Soñe umë ye niraryihni g'injañëhahn, kwëhnahnëni ikwëtahn catah,

<sup>14</sup> soñe antë nko tëfëni wëhnantul wasëwif wale wok gena toña do gë vakwëdë vahnë vële ravëk toña.

<sup>15</sup> Ge walaŵary hni wã gë vinahan hni va pacëk ile-wo-le ntidëni ÿa ifacah yed; bare ñoñ pacëna hnë vële wok vëfacëna va do wok vëhwëtahnëna va. Wahakili walëw hni wã gë vinahan vidëw va ni va përekak.

<sup>16</sup> Ntehnëdëni njëtëniha Wënu ña, bare gante ntidëni ki gwajëtehnëdëniha. Vahnë vëweh ye do vële wëyëndëha do kodina ntini iñë fërën.

## 2

### *Ikaraj anceh-wo-nceh hnë cery sali*

<sup>1</sup> Bare wëjë, karanjeryind g'ile rëfëlëk gë ikaraj catah ña.

<sup>2</sup> Dehnëryihni vicër va njëtëni vankaf vantëw hni va, nkeni vële lënënik, vële seryëk, vële yawëk hn'ikwëtahn hna, hn'ijahn hna do hn'idfuñëna hna.

<sup>3</sup> Vanëm va fëna, dehnëryihni kwëhnani vankeya vahnë vëfacah. Tëfëlëhniha nëwëndëni do antë dëcëtandëni uñen ña. Tëfëkëhni njëdahnëndëni siyab fërën;

<sup>4</sup> tëfëkëhni ñañëndënihëhni vësëval va ñahnënihëhni vësan hni gë vutah hni,

<sup>5</sup> nkeni vële seryëk do facëk, pabëni watare wadëw hni ña; nkeni vële fërënak do mawëhnënihëhni vësan hni, soñe antë ahnë kol njew wanës Wënu ña.

<sup>6</sup> Vëjar va fëna gabëryihni gante nkehandëni vëseryah.

<sup>7</sup> Hnë ile-wo-le, gery wëjë dënk ale rëfëtalahnëde gë viyë vifërën vile lidu va. Afo nke ikaraj toña do iceryah,

<sup>8</sup> wanës hu ña nke wacatah wante wok kodena nkwaji, soñe cëfëhnahnëhni vële wajëtehnëdëhi va kabi vëhnuyana wëla uweh ule nësëdëni soñe lëw fu.

<sup>9</sup> Vëramp va tēfēkēhni maŵēhnēnihēhni vēle rampēkēhni va hnē ile-wo-le hna, njēkēlehnēni ntindēni vile hnējēdēhēhni. Tēfēlēhni hna nkwajētehnēndēnihēhni

<sup>10</sup> ma ntehnēnihēhni. Afo tufahnēndēni kwēlēkwēl ikahnēnda padah, gante ntēnēnahnēdēni fop ikaraŋ Wēn Afehēt fu ŷa.

<sup>11</sup> Ha, Wēnu ŋa tufahnēk ipērēna dēŵu, hn'ile matik ufeh soŋe vahnē fop.

<sup>12</sup> Inj pērēna karaŋēdēhēfu tavin ile wok dēnēnēdīna Wēn do iŋa viŷē vēŵeh duniŷa, mē hoden njasēnden, hnē wati vē gaki ŷi, uwám hwēhn toŋa, g'usatah, do hahnēndak haryēnk Wēn hna,

<sup>13</sup> napatēnden g'itama fac le ryēwayik, do cahnahni fu icēmb Wēn sankaf fu, Afehēt fu, Yesu Kēris.

<sup>14</sup> Njēdahnēk ntaŵary dēŵu ŋa soŋe fu, pēhētahnēfu hnē fop wameh hna. Ŋadēho ntifu bulunda facah, bulunda le kwēhnēk umē, le hahnēndaf kwēlēkwēl soŋe idi viŷē vifērēn.

<sup>15</sup> Watac ye wante rēfēka aharaŋēhni vahnē va, soŋe ayabēhni ma ahnirahni g'untēnah hu ŋa fop. Wēla aryampo antē njafaŋi.

### 3

#### *Ankeya vēle hwētahnēk*

<sup>1</sup> Dēnkŵētehnēryihni vahnē vēle hwētahnēk va fop tēfēkēhni maŵēhnēnihēhni vēvē haryēnk va do gē vēsankaf nkal va. Tēfēkēhni maŵēhnēnihēhni do kēbēnani ntindēni fop vile ye vifērēn va.

<sup>2</sup> Antë njewëndëni do kehani antë conkëndëni, bare përenani do tufahnëndëni kwëlëkwël sakahn hagukah gë cape vëyënta hni fop.

<sup>3</sup> Fuhnë fëna, kobëri ña wadëhn yeyinëko, maŵëhnedelënaŵohna Wënu ña, hn'idënt hna nkeyinëko do vëramp iña meh ña fop. Nkeyinëko hn'ankeya meh do hnë uñewary. Vahnë va ñewënihëfu do ñewëlinëko fuhnë dënk.

<sup>4</sup> Bare, ante tufëhnako ipërëna g'ijahn Wën Afehët fu ña,

<sup>5</sup> pehëtëkëfuno, gena soje vifërën visatah vile liyinëko va, bare soje kaÿëhnahn dëwu ña ye. Pehëtëkëfu gë yarya hnagi hasëk ña do g'Iyir Ipacah nte yëdakëfu ankeya kasëk ña.

<sup>6</sup> Wënu ña, gë uhwëhna nëf lëwu ŵa, njëdëkëfuna inji Yir Pacah gë fere Yesu Këris Afehët fu ña;

<sup>7</sup> koyëna, catënëkëfuno gë ipërëna dëwu ña danko nuÿayin uwám usër ule hnapëden ŵa had idëw.

<sup>8</sup> Wañi wanës toña ye do ñadëfu ayawën d'us më kahnëndadëni fop vële hwëtahnëka Wën va hnë vantiyehn vapërën hna. Umë ye ile fërënak do hwëhna nafa ña soje vahnë fop.

<sup>9</sup> Bare kehary vankwajëla vanënkawah gë idëkw vacërakëlo gë wasonko do gë vankwajëla soje sariya, kabi watac wanësar fo ye do kwëhnana nafa.

<sup>10</sup> Ale fitëndëlehnëdëhëhni vahnë ña, yëdaryehna uhnira ryënkwëryënk, ge maŵëna, niraryehna higëna, ge ñwëyëk, daryehna.

<sup>11</sup> Njëtëru, iŷi sifa ahnë arumpak ye do ge nkok menënd, tufand umë dënk wënad.

<sup>12</sup> Wati nte payendidëmina Arëtemas ma Tisik, yij ñap arëkato Nikopolis hna, kabï hnam pëhnaŷu liwu aryaf a.

<sup>13</sup> Pëhwëtanëhnëryihni dŷus uyas wã vëhni Senas ahitiŷ a gë Apolos, soŷe antë nkojëhni iñë.

<sup>14</sup> Tëfëka vëlëw fu va fëna kahnëndani hnë uli fërën wã, soŷe pabëni wëŷal wante nëfahnëdëhëhni vahnë va do koyëna vëyodïna uwám uheyah.

<sup>15</sup> Fop vële yëŷun g'ami va nkaŷëryidënihi. Gaŷëhëhni vële ŷadëhëfu hn'ikwëtahn hna. Arabi ipërëna Wënu ŷa nke hnë wühnë fop.

**Wamey**  
**Wamey: Vikerëh Vikasëk Wën gë Wapëgwala (New Testament+)**

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

---

PDF generated using Haiola and XeLaTeX on 30 Apr 2025 from source files dated 1 May 2025  
f961026b-f72f-5bd7-9f75-efa7f932577e